



partii naleraq

UKA 2016/142-01

21-10-2016

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik 2013-imi novembarimi tunngaviusumik isummernerup Inatsisartunit ilalernerqarnissaanik Inatsisartut aalajangiiffigisassaattut siunnersuut.

(Suleriaatsimut Ataatsimiititaliaq: Lars-Emil Johansen, Justus Hansen, Ineqi Kielsen, Steen Lyng, Anthon Frederiksen, Agathe Fontain aamma Ane Hansen)

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik 2013-imi novembarimi tunngaviusumik isummernerup Inatsisartunit ilalernerqarnissaanik Inatsisartut aalajangiiffigisassaattut siunnersuut Partii Naleraq sinnerlugu imannak oqaaseqarfigissuarput.

Aallaqqaasiullugu erseqqissaatigissuarput Inatsisartut Suleriaatsimut Ataatsimiititaliaani siunnersuut eqqartorneqarmalli Partii Naleqqamiit siunnersuummut isumaqataannginnatta.

Taama isummersimanerput aaliangiusimavarput, makku ilaatigut pissutigalugit:

Nunatsinni inuppassuit ilaqutariippassuillu ineqarniarnikkut taama annertutigisunik ajornartorsiuteqartillugit, soorlu ungasinngitsukkut tusagassiuutitigut takugipput, maani utoqqaat ilaata ukiorparujussuarni inigisaa iluarsaanneqarsimanngitsoq, igalaat allarutinik ussissakkat, uffarfia oquttoq, taamatoqqissaarlu arnap inuusuttup inigisaa iluarsaattarialerujussuaq, ilami ineqarnikkut atugarliuutit taama amerlalluinnartillugit, inatsisartut immitsinnut siulliulluta nutaarsuarmik allaffeqarfiliullutalu ataatsimiittarfissuarmik sanatitsiniarneq naapertuussorinngilarput.

Amma meeqqat, inuusuttut, utoqqaat siusinaartumillu sulisinnaajunnaarnersiutillit ilaannut atugassarititaasut taama pitsaanngitsigisut aamma inunnut taakkununga sulisinnaajunnaarnersiutinik piiiaaffiginninneq, sipaarniarnerlu taama annertutigitillugu, inatsisartut immitsinnut siulliulluta nutaarsuarmik allaffeqarfiliullutalu ataatsimiittarfissuarmik sanatitsiniarneq naapertuussorinngilarput.

Aamma atuartitaanikkut ilinniartitaanikkullu ineriartorteqqitassat sulii taama amingaataatigisut, inatsisartut immitsinnut siulliulluta nutaarsuarmik allaffeqarfiliuullutalu ataatsimiittarfissuarmik sanatitsiniarneq naapertuussorinngilarput.

Aamma inuusuttut suliffissaaleqisut ilinniakkamillu sulii aallartitsisimanngitsut taama amerlatigitillugit, inatsisartut immitsinnut siulliulluta nutaarsuarmik allaffeqarfiliuullutalu ataatsimiittarfissuarmik sanatitsiniarneq naapertuussorinngilarput.

Aamma inuussutissarsiutit pingaarnersaata siuarsarneqarnissaanut aalisariutinik nutarterinissamut iluarsaassinissanullu aningaasat taama amerlatigisut amingaatigineqartillugit, inatsisartut immitsinnut siulliulluta nutaarsuarmik allaffeqarfiliuullutalu ataatsimiittarfissuarmik sanatitsiniarneq naapertuussorinngilarput.

Aamma sumiiffiit ilaanni, nunaqarfippassuarnilu aalisartut piniartullu tunitsiveqarnikkut taama ajortigisunik atugassaqartillugit, inatsisartut immitsinnut siulliulluta nutaarsuarmik allaffeqarfiliuullutalu ataatsimiittarfissuarmik sanatitsiniarneq naapertuussorinngilarput.

Minnerunngitsumik aamma 2014-imi maani Nuummi inupparujussuit, inatsisartut allaffeqarfissarsuarmik ataatsimiittarfissuarmillu sananiarnerannut akerliussutsimik takutitsinerat tusaanngitsuusaarneqarsinnaanngimmat.

Soorunami allanik iluarsisassarpassuarnik taasasaqaraluartoq, taamaattoq qulaani taajukkatta ersersippaat inuiaqatigiinni iluarsisassat aqqitassallu qanoq amerlalluinnartigisut.

Taamaattumik inatsisartut allaffissornikkut illussaannik nappaanissamut siunnersuut akuersarsinnaanngilarput inassutigalugulu itingartinneqassasoq.

Anthon Frederiksen